

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৮২/২০১৭-১৮

ঢাকা, বুধবার ২৫ অক্টোবর ২০১৭, ১০ কার্তিক ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। ঢাকা-আশুলিয়া এলিভেটেড এক্সপ্রেসওয়েসহ একনেকে পাঁচ প্রকল্প অনুমোদন
- ২। রোহিঙ্গা সমস্যার স্থায়ী সমাধানে ব্যবস্থা নিন : জাতিসংঘকে প্রধানমন্ত্রী
- ৩। প্রধানমন্ত্রী শেখ হাসিনার প্রতি সমর্থন কানাডার প্রধানমন্ত্রী জাস্টিন ট্রুডোর
- ৪। রোহিঙ্গাদের ফেরত নিতে রাজি মিয়ানমার : স্বরাষ্ট্রমন্ত্রী
- ৫। এসডিজি বাস্তবায়নে অভ্যন্তরীণ সম্পদ কাজে লাগাতে হবে : অর্থমন্ত্রী
- ৬। রোহিঙ্গাদের জন্য বাংলাদেশ কোনো স্বাস্থ্য ঝুঁকি নেই : স্বাস্থ্যমন্ত্রী
- ৭। বাণিজ্যিক করিডোর উন্নয়নে এডিবি এক দশমিক ২ বিলিয়ন ডলার ঋণ দেবে
- ৮। জেএসসি ও জেডিসি পরীক্ষার্থীদের পরীক্ষা শুরু'র আধা ঘণ্টা আগে হলে প্রবেশ করতে হবে শিক্ষামন্ত্রী
- ৯। বাংলাদেশি দুই গবেষক উদ্ভাবন করলেন হেপাটাইটিস 'বি'র উন্নততর ওষুধ
ঘরে বসেই ক্যান্সার শনাক্ত করা যাবে : বাংলাদেশি বিজ্ঞানীর সাফল্য
- ১০। সংসদ বসবে আগামী ১২ নভেম্বর

১। ঢাকা-আশুলিয়া এলিভেটেড এক্সপ্রেসওয়েসহ একনেকে পাঁচ প্রকল্প অনুমোদন

ঢাকা-আশুলিয়া এলিভেটেড এক্সপ্রেসওয়ে নির্মাণ প্রকল্পসহ ৩৪ হাজার ৫৬৭ কোটি ৩৪ লাখ টাকা ব্যয়ের পাঁচটি প্রকল্প অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। সরকারি অর্থায়ন থেকে ব্যয় করা হবে ১২ হাজার ৪০২ কোটি ৬৫ লাখ টাকা এবং প্রকল্প সাহায্য পাওয়া যাবে ২২ হাজার ১৬৪ কোটি ৬৯ লাখ টাকা। গতকাল (২৪ অক্টোবর মঙ্গলবার) রাজধানীর শেরেবাংলানগরে এনইসি সম্মেলনক্ষেত্র একনেক চেয়ারপারসন ও প্রধানমন্ত্রী শেখ হাসিনার সভাপতিত্বে অনুষ্ঠিত একনেক সভায় প্রকল্পগুলো অনুমোদন দেওয়া হয়। সূত্র-সংবাদ (শেষ পৃ.,ক.২), ইন্ডেফাক (পৃ.১,ক.৮), ডেইলি স্টার (শেষ পৃ.,ক.৭), এশিয়ান এজ (পৃ.১,ক.৬)।

২। রোহিঙ্গা সমস্যার স্থায়ী সমাধানে ব্যবস্থা নিন : জাতিসংঘকে প্রধানমন্ত্রী

প্রধানমন্ত্রী শেখ হাসিনা রোহিঙ্গা সমস্যার স্থায়ী সমাধানে অবিলম্বে ও কার্যকর ব্যবস্থা গ্রহণে জাতিসংঘসহ বিশ্ব সম্প্রদায়ের প্রতি বাংলাদেশের আহ্বান পুনর্ব্যক্ত করেছেন। গতকাল (২৪ অক্টোবর মঙ্গলবার) জাতিসংঘ দিবস উপলক্ষে এক বাণীতে তিনি বলেন, ‘জাতিসংঘের ৭২তম সাধারণ অধিবেশনে রোহিঙ্গা সমস্যার স্থায়ী সমাধানে যে ৫টি প্রস্তাবনা বাংলাদেশের পক্ষ থেকে তুলে ধরা হয়েছে, তার আলোকে এই সমস্যার স্থায়ী সমাধানে জাতিসংঘ ও বিশ্ব সম্প্রদায়কে দ্রুত ও কার্যকর পদক্ষেপ গ্রহণের আহ্বান জানাচ্ছি।’ সূত্র-সংবাদ (শেষ পৃ.,ক.১), সমকাল (শেষ পৃ.,ক.১), নিউজ টুডে (পৃ.১,ক.৬), এশিয়ান এজ (পৃ.১,ক.৫)।

৩। প্রধানমন্ত্রী শেখ হাসিনার প্রতি সমর্থন কানাডার প্রধানমন্ত্রী জাস্টিন ট্রুডোর

রোহিঙ্গা ইস্যুতে বাংলাদেশের পাশে থাকবে কানাডা। প্রধানমন্ত্রী শেখ হাসিনার কাছে লেখা এক চিঠিতে কানাডার প্রধানমন্ত্রী জাস্টিন ট্রুডো এ কথা বলেন। তিনি বলেন, ‘বর্তমান পরিস্থিতিতে আপনার (শেখ হাসিনা) প্রতি আমাদের জোরালো সমর্থন রয়েছে।’ একইসঙ্গে তিনি রোহিঙ্গা সমস্যার স্থায়ী সমাধানে মিয়ানমারে বিশেষ দূত পাঠানোর কথাও জানান চিঠিতে। গত ২৩ অক্টোবর সোমবার জেনেভায় আন্তর্জাতিক দাতা সম্মেলনে জাস্টিন ট্রুডো রোহিঙ্গা ইস্যুতে সাবেক জ্যেষ্ঠ আইন প্রণেতা বব রায়েকে বিশেষ দূত হিসেবে নিয়োগের ঘোষণা দেন। সূত্র-সমকাল (পৃ.২,ক.১), অবজারভার (পৃ.১,ক.৮), এশিয়ান এজ (শেষ পৃ.,ক.৭)।

৪। রোহিঙ্গাদের ফেরত নিতে রাজি মিয়ানমার : স্বরাষ্ট্রমন্ত্রী

রোহিঙ্গাদের ফেরত নিতে রাজি হয়েছে মিয়ানমার। গতকাল (২৪ অক্টোবর মঙ্গলবার) নেপিদোতে দেশটির স্বরাষ্ট্রমন্ত্রী লে কর্নেল চ সুয়ি’র সঙ্গে বৈঠকশেষে সাংবাদিকদের এ কথা জানিয়েছেন স্বরাষ্ট্রমন্ত্রী আসাদুজ্জামান খাঁ। রোহিঙ্গাদের প্রত্যাবাসনের লক্ষ্যে দুই দেশের প্রতিনিধিদের নিয়ে খুব শিগগিরই যৌথ ওয়ার্কিং গ্রুপ গঠন করা হবে। বাংলাদেশের পক্ষ থেকে ৩০ নভেম্বরের মধ্যেই এই যৌথ ওয়ার্কিং গ্রুপ গঠনের প্রস্তাব দেওয়া হয়েছে। মন্ত্রী পর্যায়ের এ বৈঠকে কফি আনান কমিশনের সুপারিশ বাস্তবায়নসহ মিয়ানমার নাগরিকদের ফিরিয়ে নেওয়া, সন্ত্রাস প্রতিরোধ, বিচ্ছিন্নতাবাদীদের বিরুদ্ধে ব্যবস্থা গ্রহণ, মানবপাচার বন্ধকরণ, শান্তিপূর্ণ সীমান্ত ব্যবস্থাপনা, সীমান্তে মাদক পাচার বন্ধকরণসহ দুইটি এমওইউ (সমঝোতা স্মারক) স্বাক্ষরিত হয়। সূত্র-সমকাল (পৃ.১,ক.৬), প্রথম আলো (পৃ.১,ক.৫), এশিয়ান এজ (পৃ.১,ক.১), ডেইলি সান (পৃ.১,ক.২)।

৫। এসডিজি বাস্তবায়নে অভ্যন্তরীণ সম্পদ কাজে লাগাতে হবে : অর্থমন্ত্রী

টেকসই উন্নয়ন লক্ষ্যমাত্রা (এসডিজি) বাস্তবায়নে অভ্যন্তরীণ সম্পদ কাজে লাগানোর ওপর গুরুত্বারোপ করেছেন অর্থমন্ত্রী আবুল মাল আবদুল মুহিত। এসময় তিনি বিদেশি সাহায্যের ওপর নির্ভরশীল না হওয়ারও আহ্বান জানান। গতকাল (২৪ অক্টোবর মঙ্গলবার) ঢাকার একটি হোটেলে গ্লোবাল পার্টনারশিপ ফর ইফেক্টিভ ডেভেলপমেন্ট কো-অপারেশনের স্ট্র্যাটিক কমিটি’র চতুর্দশ সভায় তিনি এ আহ্বান জানান। সূত্র-সংবাদ (শেষ পৃ.,ক.৫), ইন্ডেফাক (পৃ.১৮,ক.৬), এশিয়ান এজ (পৃ.১১,ক.৪), ডেইলি সান বিজনেস পাতা (পৃ.১,ক.৬)।

৬। রোহিঙ্গাদের জন্য বাংলাদেশ কোনো স্বাস্থ্যঝুঁকিতে নেই : স্বাস্থ্যমন্ত্রী

স্বাস্থ্যমন্ত্রী মোহাম্মদ নাসিম বলেছেন, বাংলাদেশে আশ্রয় নেওয়া রোহিঙ্গা নাগরিকদের কারণে বাংলাদেশ কোনো ধরনের স্বাস্থ্যঝুঁকিতে নেই। কারণ জটিল রোগে আক্রান্ত রোহিঙ্গাদের চিকিৎসার ব্যবস্থা করা হয়েছে, যাতে এসব রোগ ছড়িয়ে পড়তে না পারে। গতকাল (২৪ অক্টোবর মঙ্গলবার) গাজীপুরের কাশিমপুর তেঁতুইবাড়ি এলাকায় শেখ ফজিলাতুল্লাহ মুজিব মেমোরিয়াল কেপিজে স্পেশালাইজড হাসপাতালে দিনব্যাপী ফ্রি হার্ট ক্যাম্পের উদ্বোধনশেষে সাংবাদিকদের এক প্রশ্নের জবাবে তিনি এসব কথা বলেন। সূত্র-জনকণ্ঠ (পৃ.১,ক.৭), ইন্ডেফাক (শেষ পৃ.,ক.৫)।

৭। বাণিজ্যিক করিডোর উন্নয়নে এডিবি এক দশমিক ২ বিলিয়ন ডলার ঋণ দেবে

বাংলাদেশের ঢাকা-উত্তর পশ্চিম আন্তর্জাতিক বাণিজ্যিক করিডোরের উন্নয়নে ১ দশমিক ২ বিলিয়ন ডলার ঋণ অনুমোদন দিয়েছে এশিয়ান ডেভেলপমেন্ট ব্যাংক (এডিবি)। প্রতিষ্ঠানটির পরিচালনা বোর্ড দ্বিতীয় পর্যায়ে এ অনুমোদন দিয়েছে। গতকাল (২৪ অক্টোবর মঙ্গলবার) এডিবি'র এক সংবাদ বিজ্ঞপ্তিতে এ কথা জানানো হয়। সূত্র-সংবাদ (শেষ পৃ.,ক.৮), ইন্ডেফাক (পৃ.১৮,ক.৫), এশিয়ান এজ (শেষ পৃ.,ক.১), ডেইলি সান (শেষ পৃ.,ক.৬)।

৮। জেএসসি ও জেডিসি পরীক্ষার্থীদের পরীক্ষা শুরুর আধা ঘণ্টা আগে হলে প্রবেশ করতে হবে শিক্ষামন্ত্রী

আসন্ন জেএসসি ও জেডিসিতে পরীক্ষা শুরুর আধা ঘণ্টা আগে হলে শিক্ষার্থীদের প্রবেশের নির্দেশ দিয়েছেন শিক্ষামন্ত্রী নুরুল ইসলাম নাহিদ। গতকাল (২৪ অক্টোবর মঙ্গলবার) শিক্ষামন্ত্রীর সভাপতিত্বে অনুষ্ঠিত এক সভায় তিনি এ নির্দেশ দেন। জুনিয়র স্কুল সার্টিফিকেট (জেএসসি) ও সমমান পরীক্ষা সুষ্ঠু, নকলমুক্ত এবং ইতিবাচক পরিবেশে সম্পন্ন করার লক্ষ্যে গঠিত জাতীয় মনিটরিং এবং আইনশৃঙ্খলাসংক্রান্ত কমিটির সঙ্গে এ সভা অনুষ্ঠিত হয়। এবারের জেএসসি ও জেডিসি পরীক্ষা ১ নভেম্বর শুরু হবে এবং ১৮ নভেম্বর শেষ হবে। সূত্র-ইন্ডেফাক (পৃ.১,ক.৪), যুগান্তর (শেষ পৃ.,ক.৭), এশিয়ান এজ (পৃ.১,ক.১), ডেইলি সান (পৃ.২,ক.১)।

৯। বাংলাদেশি দুই গবেষক উদ্ভাবন করলেন হেপাটাইটিস 'বি'র উন্নততর ওষুধ

ঘরে বসেই ক্যান্সার শনাক্ত করা যাবে : বাংলাদেশি বিজ্ঞানীর সাফল্য

হেপাটাইটিস 'বি' ভাইরাসে সংক্রমিত ব্যক্তিদের চিকিৎসায় বাংলাদেশি দু'জন গবেষক অধিক কার্যকর ও উন্নততর ওষুধ উদ্ভাবন করেছেন। বঙ্গবন্ধু শেখ মুজিব মেডিক্যাল বিশ্ববিদ্যালয়ের হেপাটোলজি বিভাগের অধ্যাপক ডা. মামুন-আল-মাহতাব এবং জাপান প্রবাসী বাংলাদেশি লিভার বিশেষজ্ঞ অধ্যাপক ডা. শেখ মোহাম্মদ ফজলে আকবর হেপাটাইটিস 'বি' ভাইরাসের চিকিৎসার জন্য নতুন ধরনের এ ওষুধ 'ন্যাসভ্যাক' উদ্ভাবন করেন। বাজারে প্রচলিত হেপাটাইটিস 'বি'র অন্যান্য ওষুধের তুলনায় এর দাম কম এবং সহজলভ্য হবে। সূত্র-জনকণ্ঠ (পৃ.১,ক.৫),

বাংলাদেশি বিজ্ঞানীর নেতৃত্বে একদল গবেষক ক্যান্সার প্রাথমিক পর্যায়ে শনাক্ত করার সহজ উপায় বের করেছেন। মানুষের শরীরে ক্যান্সার ছড়িয়ে পড়ার আগেই তাঁদের উদ্ভাবিত প্রযুক্তিতে তা শনাক্ত করা যাবে। আর এ প্রযুক্তি ব্যবহার করে উদ্ভাবিত যন্ত্রটির দামও কম, বাংলাদেশে উৎপাদন খরচ মাত্র দেড় শ' টাকা। ঘরে বসেই যে কেউ এ যন্ত্র ব্যবহার করে ক্যান্সার শনাক্ত করতে পারবে। এ গবেষণায় নেতৃত্ব দিয়েছেন অস্ট্রেলিয়া প্রবাসী বাংলাদেশি বিজ্ঞানী মুহম্মদ জহিরুল আলম সিদ্দিকী। সূত্র-প্রথম আলো (পৃ.১,ক.৫)।

১০। সংসদ বসবে আগামী ১২ নভেম্বর

দশম জাতীয় সংসদের অষ্টাদশ অধিবেশন আগামী ১২ নভেম্বর বিকেল ৪টায় শুরু হবে। রাষ্ট্রপতি মো. আবদুল হামিদ এ অধিবেশন আহ্বান করেছেন। গতকাল (২৪ অক্টোবর মঙ্গলবার) সংসদ সচিবালয়ের এক সংবাদ বিজ্ঞপ্তিতে এ তথ্য জানানো হয়েছে। সূত্র-সমকাল (পৃ.২,ক.৫), জনকণ্ঠ (পৃ.১,ক.৮) এশিয়ান এজ (পৃ.৩,ক.১), ডেইলি সান (শেষ পৃ.,ক.৫)।

সম্পাদকীয়

- ক. **ভোরের কাগজ, যুগান্তর** : বাংলাদেশে আশ্রয় নেওয়া রোহিঙ্গাদের জন্য আন্তর্জাতিক সম্প্রদায় প্রায় ৩ হাজার কোটি টাকা সহযোগিতার প্রতিশ্রুতি দিয়েছে-খবরে স্বস্তি প্রকাশ করে রোহিঙ্গাদের মানবিক সহায়তার পাশাপাশি তাদের স্বদেশে প্রত্যাবাসনে সুযোগ সৃষ্টিতে আন্তর্জাতিক সম্প্রদায় আরও বেশি উদ্যোগী হবে বলে প্রত্যাশা ব্যক্ত।
- খ. **ইত্তেফাক** : যুক্তরাজ্যভিত্তিক বিখ্যাত চিকিৎসা সাময়িকী ল্যানসেটের সম্প্রতি প্রকাশিত প্রতিবেদনে বাংলাদেশে প্রায় সাড়ে তিন কোটি মানুষ আর্সেনিক দূষণের ঝুঁকিতে রয়েছে-তথ্যে উদ্বেগ প্রকাশ করে আর্সেনিকের ঝুঁকি মোকাবেলায় কার্যকর পদক্ষেপ নেওয়ার ওপর গুরুত্বারোপ।
- গ. **জনকণ্ঠ** : দখল ও দূষণের কবল থেকে তুরাগ নদীকে বাঁচাতে যথাযথ পদক্ষেপ নেওয়ার সুপারিশ।
- ঘ. **সমকাল, যুগান্তর, যায়যায়দিন, ডেইলি স্টার, ডেইলি সান, নিউজ টুডে** : ভোলায় বিদ্যমান গ্যাসক্ষেত্রের কাছাকাছি এলাকায় নতুন গ্যাসক্ষেত্রের সন্ধান লাভ করাকে সুসংবাদ বলে উল্লেখ করে জ্বালানি খাতে তা আরও অবদান রাখবে বলে প্রত্যাশা ব্যক্ত।
- ঙ. **ইনকিলাব, সংবাদ** : বিভিন্ন পাবলিক ও চাকরির নিয়োগ পরীক্ষার প্রশ্ন ফাঁস হওয়ার প্রবণতা বন্ধে কঠোর ব্যবস্থা নেওয়ার দাবি।
- চ. **ইন্ডিপেনডেন্ট** : সড়ক দুর্ঘটনা প্রতিরোধে গাড়ি চালকদের দক্ষতা বাড়ানো, জনগণের মধ্যে ট্রাফিক আইন মেনেচলার প্রবণতা বাড়ানোসহ স্কুল কলেজের শিক্ষার্থীদের মধ্যে সচেতনতা বাড়ানোর ওপর গুরুত্বারোপ।
- ছ. **ডেইলি সান** : হাসপাতাল, ক্লিনিক ও ডায়াগনোস্টিক সেন্টারের বর্জ্য সংশ্লিষ্ট প্রতিষ্ঠানকে যথাযথভাবে ব্যবস্থাপনা করতে বাধ্য করতে নজরদারি ব্যবস্থা জোরদার করার সুপারিশ।
- জ. **নিউ এজ** : নদী ভাঙনে ক্ষতিগ্রস্তদের পুনর্বাসনে সরকারি সহায়তা মাত্র $\frac{1}{3}$ ভাগ ক্ষতিগ্রস্তরা পাওয়ার বিষয় তুলে ধরে চর উন্নয়ন ও সেটেলমেন্ট প্রজেক্ট পুনর্মূল্যায়ন করে প্রকৃত ক্ষতিগ্রস্তদের মধ্যে চরের ভূমি বরাদ্দ দেওয়ার ব্যবস্থা গ্রহণ করার আহ্বান জানিয়ে সম্পাদকীয় প্রকাশ।

উপসম্পাদকীয়

যায়যায়দিন পত্রিকায় প্রকাশিত কলামে সমাজ ও রাষ্ট্রীয় প্রশাসনের সব ক্ষেত্রেই নারীদের অংশগ্রহণ নিশ্চিত করতে হবে বলে উল্লেখ করা হয়েছে।

নিবন্ধ ও ফিচার

ইত্তেফাক পত্রিকায় প্রকাশিত ‘শিশু নির্যাতন বন্ধে সম্মিলিত উদ্যোগ জরুরি’ শিরোনামের নিবন্ধে শিশু নির্যাতনকারীদের দৃষ্টান্তমূলক শাস্তি দেওয়া হলে এর প্রকোপ কমে আসবে উল্লেখ করে অভিমত প্রকাশ করা হয়েছে।

#

ডালিয়া/ফাহিমা/মরজিনা/সাইদা/রশীদ/তানিয়া/২০১৭/৯.০০ঘণ্টা

